



90089

斛山楊先生遺稿卷之二

祭文

祭原方畦先生文

先生蚤棄軒冕樂道力田視不義之富貴如浮雲之  
漠然惟欲窮討古今之典籍以擴充其未盡之天踐  
履方正宵次高遠其超乎塵外也如鳳凰之高逝必  
千仞而翔其確乎不拔也如松栢之挺翠貫四運以  
獨芳慨君子之存歿為人世之否臧何皇天之慙遺  
俾遠邇其感傷爵忝為知友聞訃奔走心懷永悼匪  
言可盡敬陳薄奠先生享之

祭次女文

嘉靖二十二年三月初一日父在獄中以書告石氏  
女子秋之墓曰嗚呼痛哉女子秋汝有知乎其聽父  
三千里外哭汝之言去年三月某日汝偲兄到京以  
書告我言汝疾病秋九月汝休兄復告汝病日深吾  
見其詞語悽愴若有隱不盡告之意今年二月內仕  
自家鄉來吾以書問汝存歿且言當以實告休等始  
言壬寅歲夏四月十五日丑時分汝以疾終於汝家  
是時偲仕皆在京師休與汝母共送輜車葬汝於盤  
月村之南嗚呼子秋汝果死矣不知是何等病乃即

死也吾數汝死期在吾下獄一年零二月之後將無以吾得罪之深惶懼不寧即成病以死乎果若此吾心不能不汝咎也吾觀古今以來為人臣者豈無狂愚妄論時政身陷罪戾如我今日者乎為其女子者或有天性仁孝篤於愛親而不解於心者豈皆憂戚成病淹焉莫救以殞其生乎嗚呼痛哉子秋汝何至於斯也汝何至於斯也吾尚記汝童稚時吾教之使讀孝經論語及女訓諸篇汝又數向予索讀烈女傳吾見性資聰敏多能曉悟但過於剛烈不能含容忍耐以成中和之德此等氣象與汝父絕相類也汝父

罪難悠悠自分宜死死而蒙恩歸葬故里吾欲汝姊妹兄弟懸棺而窆封以馬鬣樹以荆梓共成一哭從此朝夕朔望再勿流涕豈意汝即早死使吾於囚繫顛危中反哭汝痛汝弗能已耶嗚呼子秋狂門深鎖今已三年汝父一念白日青天忽聞汝死雙淚漣漣西望茫茫未得洒汝墓前念之窮極一至斯焉乃十九年庚子歲秋子始北行汝與汝姊送我中庭視我漸遠顧瞻徘徊容顏戚慘雨淚盈腮汝父不德天毒降災乃汝姊妹淪胥以摧二三年間黃土兩堆我心匪石胡不痛哀今吾寫此傷悼之情命汝休兄以家

釀一盞麥飯一盂歸告汝靈父若得荷

主上再生之恩歸來有期念汝長逝心抱無涯之悲  
即於汝姊汝墓次第哭之嗚呼子秋汝來顧此

雜著

香灰解

予復下獄半載為丙午年三月初七日晨旦東廠使  
邏者來覘即予卧側以殘甃藉囚板上相與偶坐者  
久之獄中穢氣鬱蒸久在內者習不自知從外乍進  
則臭不可堪乃以捧香一莖挿坐前甃縫中焚之須  
臾香盡灰不散宛如一完香焉予取而懸諸壁上至

斛山遺稿卷一

三

第五日猶未散因思其故為作解以散之夫是物也  
其將中抱憾積憤凝滯於此而有不釋然耶抑焚猶  
未焚而托此以為永久耶二者雖有間焉而其精誠  
感致則一也遭世垂變人定勝天即一物之微而其  
用之所措固有幸不幸焉耳蓋賓筵廣設幄錦幃羅  
庖翟薦德恪舉殊儀叶五和切音職上肅環冕下列笙歌君臣  
交慶委佩鳴珂旅語之際嘉謀孔多聞善即聽若決  
江河王猷下降枯槁滂沱雍容揖遜永息干戈上安  
下順宇內冲和則唐虞三代之境界也燒異薰以昭  
明德固已有之舍彼其處而來焚吾獄中焉此何等

氣象也瑾攏掩戶日影不通塵留負鼠隙引汚風三  
息淹淹百慮忡忡其與吾環列而偕坐者不過三五  
囚徒東西南北偶此相逢或十三四齡口尚乳臭之  
堅子或八九十歲鬚眉皓然之老翁身披帶索首冒  
飛蓬額蹙氣喪肌削腸空縱蓄百金一動即窮荷校  
滅耳罪彼不聰手梏足械濃白血紅俯就坎窞仰呌  
穹窿使聞之者皺眉見之者戚恫甚至於不能為心  
則閉目掩耳佯為瞽聵爾來焚此可謂擇地擇人之  
未審忽於所入而謬于所從者矣久而不化疑有神  
明類彼志士之死不瞑嗚呼其劉忠愍耶抑周蹟山

浦竹塘耶不死正寢死此福堂名垂不朽同彼霄壤  
與我國家為龍為光雖然陵谷有時而變遷金石亦  
至於消泐故凡合氣成質寓形宇內而為人為物者  
終歸於盡天地如此其大也古今如此其遠也其孰  
不蕩為灰塵而揚為飄風乎爾其欲外消息盈虛之  
常道觀反復無窮之世變以後天而終乎是固無此  
理也吾為爾摩散之再拜而祝之曰匪人焚爾惟爾  
自焚爾不馨香與物常存燬以烈火騰為烟氤上而  
不下聚而不分直衝霄漢變為奇雲餘香不斷必必  
芬芬龍逢比干相與為羣爾宜自慊胡為云云理無

二致吾以喻人事苟可死何憚殺身願爾速化歸彼  
蒼旻樂天委運還爾之真拜起悽愴雙淚盈襟嗚呼  
易化者一時之形難化者萬世之心形化而心終不  
化吾其何時焉與爾乎得一相尋也

宋忠簡公像贊

建炎之初皇綱解紐二宗北轅一帝南走寤寐思賢  
宜不敢後而於公忠猷棄如糞土事至於此天實為  
之於人何尤嗟夫使公回鑿北征之跡得一舉行則  
仗義揚威經營四方根本之慮付之李綱將相協力  
國勢以昌燕雲以北我圍我疆天子之守可在四夷

而徽欽父子可生反於漠荒惜其為群小阻抑懷恨  
而歿使中原流血宇內分割鬼哭神憤莫可救藥相  
緣相習而多自戕伐保養奸諛賊殺忠良奔播危促  
退而渡江遂至帝王統緒闕海一舫焚香就溺以告  
滅亡而為志士仁人所痛傷然則公一身之存歿豈  
特為朱人國步之隆替而實萬世華夷天地之所係  
也

七月七

世傳七月七日天孫出嫁人間女子乘時乞巧唐人  
柳子厚亦有乞巧文嗚呼女子所乞者刺繡中饋之

能耳丈夫之巧欲何為哉予今日獄中所乞則異於  
是他人乞巧予惟求拙他人乞榮顯予惟以罪自安  
於困辱焉予素所畜者欲退則躬耕畝畝以全微軀  
進則勞心以利天下此平生之志至拙之術也庚子  
歲以愚拙應徵任職五月食君之祿未敢苟安但知  
為宗廟社稷萬萬年深長之慮而不知為子孫身家  
一日計此非拙之尤甚者乎當是時予之拙見謂天  
下之事吾當拙為之不可為當以拙退之不能退當  
以拙死之以拙求死不可得而今當以拙坐監故展  
轉凶危苟延殘息於五年而不自悔皆拙之驗也願

天孫鑒臨下土照我衷曲即我素所欲而未能自盡  
者以增益之使我抱此迂拙終身不易生為拙人死  
為拙鬼無使我志身殉國之拙或變而為苟生利家  
之巧焉乙巳年七月初七日爵焚香再拜祝

讀易

余既久在罪難中自念君子存仁造次顛沛未嘗少  
懈歲月云邁百年易失頃刻光陰未可以若醉若夢  
而玩處之也即卧側障之以簾盥手焚香凝神清慮  
讀易於其間客有謂予者曰其名此為安樂窩可  
余應之曰不然也余之罪多矣奚以安樂為哉人之

處世非安樂則困辱二者而已世之人或以富貴為安樂以患難為困辱此固未然而謂吾之處困為安樂亦非也夫其所為慊於心而合乎義理之中正則雖口在患難此未嘗不安樂也夫其所為愧於心而戾乎義理之中正則雖日處富貴而此心未嘗不困辱也吾之所為質於古人之作用為何如其愧於四聖亦多矣然則名吾所處為困辱窩可也又奚以安樂為哉况易之為書廣大悉備天地萬物之理具於此損益困節中孚習坎則切於處憂患之道也因銘以自警銘曰安樂安樂由心之作展轉困辱惟吾所速四聖垂訓炳炳簡編議之而後動擬之而後言或可以觀象玩辭而補吾之愆

清明

清明節人以柳絮一枝贈予予即謝之以詩有知君憐我國中久故送乾坤生意來之句既而觀之不覺心曠神怡動靜坦夷鬱抑百結之愁腸忽變而為廓然無涯之膏次矣於是喟然嘆曰天地生生不已之理仁者渾然同物之心耶此可以默識而旁通之矣吾意此時風景清和百彙亨通芳堤曲岸之間賢人君子携酒賦詩相與更唱迭和而賞此柳者或有之



賢人君子蓋賞物之待其所也物之得所由人之得所也人物得所豈易言哉予乃持以歌之歌曰春遲遲兮日融融飽雨露兮舞東風感物類兮動吾中動吾中兮憂叩叩

劉秀才字說

泰和劉秀才名年字以時予為之說曰年統四時春夏秋冬不失其序天之道也性具四德仁義禮智出當其可人之道也以人道合天道惟其時而已性焉安焉者謂之聖復焉執焉者謂之賢士希賢賢希聖則純乎天矣吾敢以志此人道而疊疊不怠者有望

斛山遺稿卷二

八

於年焉

書

與司官書

竊惟執事名臣後裔儒林節行自理北司事以來獄中人盛德之贊青天之謠走二人得於耳聞者亦久且熟矣往年曾寺丞子如獄中具道二執事於爵其垂念曲全之心甚為切至以二人事喻東人云幹國之臣當為調解此皆二執事痛隱時政懸切國民而為世道深長之慮之心也豈特區區為二人惜哉在二人未嘗不銘刻肺腑感激思奮益自砥礪而求不

負賢人君子之許可焉屢欲修書啓謝以罪難中多所不便而止其敢忘此厚德而忍於自薄也十月初爵以事出窮迫以死自誓又不欲苟且泯沒使死無聞焉思欲具書以獻

主上以盡垂歿忠蓋之識其書始終千餘言人抵援古証今剖析於義利邪正之幾懇切於安危存亡之戒欲

主上納諫容直以成君德以廣君道與唐虞三代無美比隆中間有云臣以罪處獄中四十五月有餘矣延此一息尚未死滅此實

陛下好生之德覆載之恩之所及而陶某等於臣飲食一節曲為區處不欲置臣於死使

朝廷有殺諫臣之名其心未必不為忠於

陛下者也此數語者實以古人之作用望為執事之能事焉諺云以所重加於所好爵以人臣以道事君者而望二執事是以天下古今所同重之道而加之矣其待之可謂至厚期之可謂至遠矣時以楮筆不便未能稿具君門萬里亦無由為

九重獻而徒能以口誦耳故嘗數語邏者云我有心事願告

朝廷汝為我達之所以為此言者以冀

主上明賜紙筆則頃刻可成稽首以上雖死不恨天  
啓 聖衷萬一感悟不惟於國家大政有所裨益而  
二執事之高義美名亦因得以示天下傳後世矣近  
日獄中嚴戒之故走二人亦頗聞其詳矣顧事至於  
此莫非天命上則

朝廷之法下則人臣之罪在二人敢不修身以俟而  
順受之乎但身居言路職任諫諍中奮感激不無觸  
犯而雷霆赫然之下既以微示戒笞而全此生矣以  
一時言語文字之狂妄而數年坎穽禁錮之凶危則

斛山遺稿卷一

所犯之罪與所服之法亦足以相稱矣今復以梏  
鎖加之以非常之法而置之於必死之地焉在二人  
一時之存亡雖甚微而關於天下國家者為甚大故  
憂憤感悲盡誠號呼而慨吾遭際之不淑此心此情  
實不能自已矣每夜初上鎖腰絡曰群網曰生根一  
人立而唱之數人縛而為之以此治元惡寇盜之峻  
法舉而加之於出百死為

宗廟社稷慮之諫官焉則時至此真可為痛哭流涕  
者矣况二人家貧路遠官淺罪深窮乏已極於守獄  
校卒無毫末德意推以相及則舉手之際有何情分

非有二執事在上將誰倚以存此生乎即今幽室寫  
香門扉畫鎖漫漫然與長夜無以異下地冷木之上  
肌膚凜烈一苦一席之藉皆事屬觸法而并為人所  
徹去坐卧起立展轉關禁一飲一啄率至窮詰其萬  
辛萬苦萬窘萬迫之情狀視獄中諸犯其嚴急之過  
不啻十倍聽其言語察其意向似欲二人速死以畢  
事焉耳竊以為九此毒苦之甚二執事或未能以盡  
知焉荅曰知之則化年仁愛所及固切切焉欲全此  
殘生矣而今復不以生處之豈肯以數年至厚之德  
轉而為一日之甚薄乎故二人直慮以為二執事決

不知其如此之甚也或者以一分謹慎分付而下之  
人奉承之者過於十分焉此則事勢至此容或有之  
今日切近災禍二人已身久罹之天地鬼神照此衷  
曲而志窮慮極亦已甚矣故不恤冒瀆之罪敢以迫  
切悃素仰告而無所匿欲望此等毒罰仍賜寬恕但  
不時預備若事出不測則倉卒即可處辦決不敢以  
餘罪有累於二執事焉如此則情法庶幾兩盡囚繫  
顛危之歲月或可以再延矣雖東人覘視日在於此  
而彼皆二執事屬下舊人天理之在人心者未嘗亡  
而見其知好惡曉事理者十常八九更煩以一言致

喻則若輩未有不信從者矣若二執事不為顧念而一聽下人之巧為則寒風凜烈之際羸瘠弱尋之質實難克堪而二人相繼死者有日矣天地間無不死之人無不化之物誠使二人一旦命先朝露倏忽殞滅為死於諫職之下求仁得仁志固未嘗不自慊矣豈以一死為惜哉但念

天王聖明堂堂天下不能容此致身報

主之直臣使竟死獄中於二執事數年保全之德愛亦未得終始領之人臣之禍朝政之損

主上盛德之累為天地間留一無窮之悲恨矣故昨

嘗有詩云九天風色夜蕭蕭此日君門萬里遙不是諫臣愛一死殺身恐累

聖明朝此實二人惻怛悲感惓惓不已之心也古人願為良臣不願為忠臣二人今日之事其是非得失固不容以自喙矣但慮天下後世有志士焉其慷慨殺身而存視死如歸之節者實有鑒於此焉天下後世有仁人焉其見幾而作得明哲保身之宜者亦實有鑒於此焉所見不同而好尚斯異一時心事固為人之所取而亦為人之所戒焉若二執事身當今日之事上不使朝廷有殺諫臣之名下不使忠臣義

士吞泣飲恨鬱抑於九地之下則經權迭用有善處之道存焉耳有祁大夫則叔向得以不死黨錮之禍非霍譖不能遽解而郭楫之語范滂事雖未就而高名千古不朽也二執事有賢者之節介有能者之作為故二人敢以古豪傑之事業望之而欲其成廟社之遠圖焉富貴福澤日之榮寵名節道德萬世之瞻仰於事變難處之際而綽有處之之道非吾二執事之高出俗輩將誰望焉

嘉靖丙午春三月謝吳知府書名孟祺同年也

陸泉公祖老先生台座下去歲歸田里於同州公署

中獲睹執事論屬官語一念惻切常在閭里厚下之心可謂至矣既抵家旬日應酬叢冗未及伸一言以謝累年德愛而天罰所及檻車復就道矣繫過華州道中遇一人自言為府中使區區瞿然下馬恭問起居且致惓惓慕戀意其人已達左右矣竊念執事以義理宵襟經濟才略典此繁郡追配先哲如余馬輩者必不多讓等而上之有雋不疑第五倫皆京兆舊尹功業峻偉光昭簡策固已為明公之能事也伏願厚自愛以慰遠邇之望鄙末以殘喘弱質履此艱危百死一生且不保夕首陽之及固自甘心東陵之幸

不敢復冀惟信步達去隨身所到安於僇仆狐狸轔轔一聽其來但不知彼蒼者天於冥冥中何如以籌之也小兒歸家意必領文赴考獲一拜候故謹布寸衷遙問道履荷高明年家之情骨肉之愛一時紙筆不能盡述臨楮無任仰瞻爵頓首再拜

上楊知府書名守約也

尊兄楊先生台座下往時繫過洛陽獲接德容繼蒙厚愛心切感荷次日渡河遇馮巡檢涇陽人以鄉里故設盃酌於舟中以相送具述執事德政為人心所嚮服且曰真邵父杜母也真邵父杜母也區區與一二

同行者共嘆馮巡檢之言且知高明以君子長者之德敷而為厚下悅民之道有體有用不負素履真可嘉尚將來責任事業已預可知矣小兒歸道由治下謹候道履并伸謝感臯難中有懷耿耿不能盡言

與楊督學書

大文宗楊公祖老先生台侍下自執事下車後即聞凡事從厚有長人之度去年區區歸田里遇士夫相語皆謂純以德禮化導中心悅服稱頌者無間於彼此既而繫過河南府蒙令弟先生之愛以有偕行者未得叙談次日渡孟津馮巡檢涇陽人以鄉里故置酒

舟中酌以餞送彼歷述令弟先牛德政且謂人皆以邵父杜母稱之區區既嘆馮某知言因思海內士夫兄弟登高科躋顯宦者往往有之求如明公兄弟一時皆以賢聲聞者蓋鮮矣世有寬厚君子百凡敷理優裕闊大下人有過開誠訓誨必不得已而後罪之片善寸長愛如已出故曰與其殺不辜寧失不經其心休休其如有容則身享盛德之令名而福慶遠延於後世如吾明公者其天資學問大率類此亦有所謂嚴明君子者如古人言察見淵中之魚人之畏懼有餘而悅服不足此雖未為不可然成就終小非所以語明公也伏望益加涵養不更初志必以天下為度將來大其勲業為霖雨以澤潤斯世是愚昧所以深望於高明者也小兒將歸意必給文補考故謹述寸楮仰候道履困難中身心眩貿語言無次有容君子必能情諒若累年德愛耿耿在心者非一時筆楮所能盡也

與汪撫臺書

汪周潭公祖老先生台侍下兩接手範適值窘迫未得款領教益十餘載相離百死暫出復就危地邂逅之際此心當何如哉小兒歸過潼關謹布謝忱拜候



起君厚德厚念誠非一時筆楮所可悉也明公以義  
理用事治化所及遠近傾慕他日誕樹勲業達諸天  
下愚昧倘不以狂罪死則耳濡目染或有日焉伏願  
厚自愛以為世道益多凶多懼之地中心藏之不能  
盡言

與田主簿書

大德君子田道克尊兄先生侍下自癸未年侍清教  
於長安書舍中當是時愚昧竊兄德範自淑者日多  
有之既又倏會倏別至戊子秋消息不相聞者將六  
年不圖於繫檻危迫凶禍不測之際得一邂逅於他

鄉焉且喜且悲把袂客館傾懷款叙漏至夜分而各  
忘其倦則脫然於形骸尔我之外矣次日策馬遠送  
於數十里之外達子營蘭若中情戀戀將之以酒餞  
重之以贖貺洒淚流涕一行一酒每念及此中抱惻  
切宛若復一相見也不才於十月二十四日至京次  
日赴吏時復下獄中因困之狀固一同於往時但五  
六年間顛頓挫抑血氣漸衰精神漸減視初入獄時  
凡百摧折直能以身當之而畧不為難者則頗有間  
矣誠不能真有所見而樂天委運處以寬裕但勉強  
掛遺於意外之加一聽其來或竄身異境以禦魑魅

或填屍溝壑以恣狐狸皆不才宜有之罪夫何敢辭  
若幸天恩復歸田里過閱鄉城外再圖一會則千百  
中之一二也實不敢望小兒歸謹候起居且致謝忱  
意不盡申之以辭曰嗟人聚散有類浮萍慨今憶  
昔予雙淚沾纓他鄉邂逅有懷盡傾君之育次予  
塵垢功名嗚呼把酒予送行難別予友情宇內關心  
予此身匪輕臣罪當誅予天王聖明

與原負外書

方畦年兄先生門下去秋幸獲一面不圖復有後來  
事數年傾慕未得盡慰潼關追餽亦以窘迫倉忙之

際款陳不便草率奉復暨冬十月二十五日夜復下  
獄中囚繫狀一同往年或死或生皆古今人世常有  
之事不足多道尚記歸時途中遇周潭公輔相問勞  
即擊節歎賞謂兄體用該備學業淵源更非昔比想  
林下數年靜閱幾微熟仁精義於宇宙事皆在吞吐  
中矣昔者幸庵彭先生欲出則效諸葛孔明退則效  
陶淵明為二公像置書屋中朝夕敬觀以自勵焉前  
輩尚友古人一飯不忘故事業遠過後人吾兄今日  
進修質之先哲同一揆也故耿光昭著朝野推重小  
兒近日書告與舍甥禹卿侍教下區區深自慶慰小

子輩幸遊君子門下咳唾所及無非身心之益但彼資性愚鈍數年奔走已成荒廢恐無受教之地謹謝眷念爵頃首再拜

與原方畦先生書

方畦年兄侍下拜讀教翰知起居萬福困憊中亦切喜慰西望瞻思萬里杳杳強起述此以告第不知兄之家慮何如恐不能不勞心也春秋百王不易之大法扶衰轉危見諸行事仲尼作用盡在此書兄潛心及此所志不小但井渫不食亦運數使然事自關於天下已身通塞不慮也近日得對山集讀之每切感

慨蓋世之才經濟之畧真以罕見其儔傑人志士積抱負於生平者孰不欲親見其行轉斯世於隆古之盛乎然所願不遂則亦莫如何矣願兄以古人自期待進則覺一時退則傳後世禹卿望教訓勿聽廢棄

與胡知府書 名汝輔

郡伯大君子胡公祖老先生大人侍下自庚子秋幸與教下寵顧寔多凶危中六七年間於厚德厚愛未嘗不在懷思去歲夏六月會高吏部始知執事有關中之行高言郡大政繁實推擢任之年來屢聞垂念心實悲感僕淹淹殘息百死之地朝不慮夕執事不

忘舊好是以古人自處而僕不足以當盛愛矣伏思  
前輩如余司馬柴總制皆以英哲練達久典此郡明  
公碩德遠猷與之並駕他日功名事業彪炳宇內以  
霖雨蒼生者今實基於此焉僕或非不即死尚當有  
傾聽之時伏願為

宗社生靈厚自愛偶便謹此遙伸謝忱囚板殘軀之  
上不能布困憊昏惑筆札欠恭高明知我必不深辜  
賦

夢遊山賦

時和煦以轉泰兮歲惟丁夫壬寅予彷彿於夢中兮

夢歸遊於咸秦歷韓魏之故疆兮泛栢舟於渭濱浮  
颿颿以遠覽兮暫憇夫山之危岑乃吳嶽之崔嵬而  
秀巖兮古號曰西雍之鎮峯突岫以峻出兮勢若連  
乎霄辰石巉巖以峻嶒兮百壑研其嶙峋風習習以  
清和兮迹迥脫於世塵草與木森森而天喬兮秀雲  
逸其萃萼鳥與獸蹒蹒而頡頏兮若解意以相馴予  
乃采芝蘭以聊茹兮氣和煦而苾芬把清泉以時酌  
兮蕩吾夙昔之塵襟忽回顧以寥廓兮百峯羅翼其  
共臨俯仰于長嘯而朗吟兮高宵次以樂真山有廟  
焉迤邐其麓之東南兮以時妥侑乎嶽神棟宇苞暈

其壯固兮丹青煥乎其惟新背蹙噬而面涇渭兮延  
廣袤其幽沉古取大萃與渙之大義兮儼嶽像以獨  
尊予乃肅容儀以瞻拜兮心慄祗其快覩復長跪而  
祝之曰惟明神其監觀于下土以大義而降禎祥與  
妖孽兮斯固無幽而不燭夫何世事之紛紛乃有稽  
典訓而不類兮固予中心其眩貿予敢筮游行而不  
子隱兮願得夫子奪之微故惟予小子之有生兮何  
不辰而遭世風波洒憂時之血忱而貞志於乎先子  
固久罹於窞坳時省愆而思咎兮求不忝於屋漏於  
歲月之陽春兮今已兩過念予總角而志學兮每矢

心以克邁嚴步履以出戶兮敢斯頌而或怠景先哲  
以周旋而與歸兮忽凶害焉其顯崇固予小子反復  
思之而莫知其謂也語畢悽慘流淚潛然偃僂伏俯  
聽神所言惟神鞮爾而有聲兮復喟然其長嘆曰嗚  
呼來汝小子兮是爾之愆爾不聞曲其躬而圓其行  
兮取封侯以相先或有貞直方而未少回兮死固不  
免於道邊當行而吾行之兮當止而即止斯先達之  
明訓而可敬服兮胡不珍身而量處道固不能無消  
息兮應斯有常而有不苟相幾而或少戾兮夫孰非  
以災而自取惟明哲之見高一世兮動自遠於坎珂

燭隱機而尚肥遯兮泛長江之一舸乃有迷檢括而  
未諾兮拂潛晦以自顧銜崑山之良璧兮人共惜夫  
楚和履大閑而不苟措兮固自謂世所尚也當柄鑿  
之不類而欲強置兮孰不指身心以為訛嗚呼小子  
而今後其尚疊疊焉以克勵未可以一蹙而遽挫思  
福堂之王汝於成兮方一念之偏頗惟古良士之堅  
志於患難兮日尚友以切磋寧維介之耿於羅網兮勿  
狡兔其爰爰寧松栢挺挺於歲寒兮勿桃李其灼灼  
何所往而非吾可安之地兮慎無怵中而懷憂彼皇  
矣之全賦於有生之初子惟反身而是求聽吾誨爾

之諄諄兮尚不忝於前修苟迷途其終不悟兮乃脂  
膏以自羞予乃再拜稽首而起應喑喑其未已將周  
旋以出戶忽驚愕以覺悟時東方之既晨愧絲粟於  
枕衾嗚呼天耶神耶教戒儼切誠可信而可遵大道  
坦坦而無曲兮固不越乎吾之心

側惻行送王大尹出獄

惻惻送君幽繫裏天涯回首如千里此歸何以估斯  
民直須德化平如水最憐愚昧與饑寒古今失所皆  
由此受托宜思君父恩同類孰非吾赤子君不見蒲  
鞭一段好生心天地萬物真同體

古栢行送王子言

雨秀金吾古栢叢老枝猶解起南風乾坤留眼吾看  
栢着時聊與子言同看栢豈惟憂自崇看相還增恨  
無窮獨不見去冬飛雪滿長空宇內應無桃李紅偶  
從挺挺寒栢下與爾送出平定公

平定公  
言同鄉

山西行

吾聞往歲旱魃災赫赫炎暑毒埏坎隴上禾苗盡枯  
稿茫茫千里赤塵埃疾威均為下土虐山西之民尤  
可哀閭里餓莩無所告昊天又降酷烈米草茂秋高  
虜勢張胡馬南侵混疆場可憐百萬生靈命盡在虜

人刀下亡太原城外數千里血流漂杵遍封疆死者  
縱橫如山積守臣不敢奏朝堂殺氣騰空鬼神愁尸  
填溝壑水不流舊時邑落數千室而今且無二三留  
醜虜變譎不可測邊將何不早為籌在廟謀坐算要  
得良平策經略須用韓范儔夷狄世為中國患古來  
誰不事先憂君不見薄伐玁狁勵士馬周王允是中  
興者當時文武有尹公舉旗一麾清郊野又不見漢  
帝當年重細柳亞夫軍前無躑躅拊髀思賢一飯切  
魏尚復作雲中守天王我皇聖且仁區區周漢豈作  
倫常慮一物或失所豈知虜禍瀆蒼旻我願君王目

視遠燭沕穆望見山西境上多白骨我願君王耳聰  
聽幾萬里時聞山西哭聲夜不止

書白樓詩卷

趙總兵說也

將軍之居近白樓將軍之才冠帝州膏中自有兵百  
萬曾出將府舒國憂而今久作園中客邊塞孰為胡  
兒愁一到園圍八九月手執周易誦不輟將軍本是  
儒者流於此可以觀志節雲鳥往時成八陣韋編此  
地慕三絕每向憂中尋樂處魯史周文日講說談文  
論武擬虛舟我識將軍豪興優身雖凝坐一室間心  
在羲皇境上游嗟予真機久未關狂惑速禍自天來

耐山遺稿卷二

三三

還幸此日成良晤彷彿樂趣散愁懷世上紛紛苦幽  
帶困事誰解昔人忘幾時各得歸山林毋忘爾我自  
相遇

歌

七歌

有手有手手段拙弄得人世紛如雪未宜醒執名利  
板但可醉撈秋江月忽忽百年成甚事微微一息久  
將絕嗚呼一歌兮為爾憐要撥雲霧轉晴天

有脚有脚脚步錯錯走當年塵世道崎嶇多是倒人  
坑一蹙反為魑魅笑未死還餘憂世夢有生堪類霜



前草嗚呼再歌兮歌王壯蹈入冥海千層浪  
有耳從來豈不聰人說宜西我却東萬方愁苦聲堪  
痛收入無底雙竅中迅雷不顧額前震身禍飄如輪  
後風嗚呼三歌兮歌愈悲傾聽莫為利口移  
有目閑將一世愁聚來都放在眉頭肉睡不見羊腸  
險血淚可增江海流我思哲人瞻萬里乾坤顧盼在  
雙眸嗚呼四歌兮歌意頻要識人間假與真  
有身形弗七尺長地維天柱要擔當幾年鉞成空皮  
骨扶杖出門欲仆僵外混塵埃羅羅網內抱赤心與  
忠腸嗚呼五歌兮歌迫切洒盡天涯一腔血

有子有姪未成立音書問我我惻戚跋涉往來六七  
年千山萬山日灑泣讀書耕稼總難為思量到此喘  
噓吸嗚呼六歌兮歌未闌父死誰憐汝饑寒

有甥生年為我勞往時見我使長號汝母今年將半  
百骨肉屬我父母毛兄弟往來無了日令我憂中思  
爾曹嗚呼七歌兮心未已收我殘骸歸故里

丙午年首夏患足疾六月淫雨大作獄屋中水  
深二尺許囚板漂沒六七日始退重此濕感不  
能步履今一載矣殊覺哀備恐倏殞滅為十招

魂以自慰卧起慷慨援筆立就詞固不能盡丁

也丁未年四月二十五日作

兩足屈樂雙目眩暗身孱罪長影形相伴百憂時觸  
五內悽慘耿耿策策夜以達旦生理幾何魂將我散  
嗚呼魂兮魂兮宜莫即散我

皇聰悟當有奐汗

愚慮參差成此幽困綿綿赤抱皤皤白頭過隙野馬  
涉世浮漚狂迂速罪予復何尤魂欲我去飄忽遠逝  
嗚呼魂兮魂兮爾無省蕩骨肉萬里淅泣我望

我生不辰長夜轉戚悠悠蒼天燁燁白日沆瀣瀰漫  
乾坤穆沕哭者既死嘆者為失依魂杳杳十喪六七

斛山遺稿卷二

二十五

嗚呼魂兮魂兮哀職爾補少延湏吏孰無肺腑  
陰風瑟瑟旅燕唧唧暮雨朝雲胡為我急身世窮年  
天涯一息寧為髀骿羞作鬼蜮我生為勞魂欲放逸  
嗚呼魂兮魂兮慎爾先發與我相湏受天之罰  
百感摧剝寸衷消毀長昊黃靈滿腔赤淚有覺殘生  
無涯謹崇癸癸回風滔滔逝水魂如不來伊誰為類  
嗚呼魂兮魂兮孚我以心人生遭際往古來今

半百生涯一軀殘軀孤抱憂勞萍踪屯蹇萬死交戚  
九天玄遠假寐長思流光空轉魂欲幾何灼灼微燄  
嗚呼魂兮魂兮何遽舍我我欲爾盡散無不可

人生幾何吾豈戀戀成吾一死反貽國患歲序屢遷  
久甘幽難使我

君王不殺忠諫魂何傍徨去如飛翰嗚呼魂兮魂兮  
孰非天命於此永依安土以聽

風塵遠邇薄暮茫茫此際勞人孰不永傷悲萬里天  
斷九迴腸誰乘危幾憂我

君王我魂寥落便欲長往嗚呼魂兮魂兮努力炯炯  
人謀既藏天步可永

自我復來寒暑更度日月信速轉看百首我思故人  
伊誰可友履義安仁身類塵土死也生也彼亦何有

嗚呼魂兮魂兮吾何爾號恐將一死輕於鴻毛  
男兒脚步自有圓方由我顛躓之死何妨履我后土  
戴我穹蒼省我之愆是我之狂魂如解此安我福堂  
嗚呼魂兮魂兮聊此相將待我罪終任爾飄揚

古詩

四言古詩

颼颼西風悠悠危困霧掩長空懷此憂疾我生尚存  
我心難忍告爾君子不可不慎天方威降無滋幽釁  
颼颼西風悠悠危困我生不辰遭此難屯告爾君子  
胡不自盡拯溺救焚伊誰之人天方降威無為顛震

颺颺西風悠悠危困自昔以來始我愁懣告爾君子  
各宜履順誤國之謀伐國之刃天禍方殷無惜憂墮  
颺颺西風悠悠危困我心日憂我淚日收蒼天蒼天  
胡降阨運謀猷爭離而日以甚抱此赤心徒爾諄諄  
何以圖之周道惟近騏驥惟良莫耶非銳聽無不聰  
視無或瞬各欲事天豈敢相迫我為爾謀爾無不信  
五言古風

志士輕天下不類世人情由來守之固出自見之明  
時執誠可尚古今不易真緬懷千載上愧此魯連生  
存趙片言重却秦天下驚脚跟高蹈處無跛總是乎

次杜少陵韻荅人

殘息悠悠在真成一懦夫當年何所為心欲見唐虞  
世運豈翻覆人為自險夷好生與惡死此念膏中無  
采葵

幽中惜歲月日暮采園葵采之何所用欲以贈相知  
相知相去遠道諾多阻蹇安得藉晨風萬里寄誠懇  
四丁寧贈錢員外緒山

留心剪枝葉枝葉更穠鮮努力勤于耒共耕方寸田  
吉人常默默浮士好便便覺彼高騰處反將真意掩  
昊天但覆幬四運自周旋孔聖無言教真機向此傳

丁寧一告語告以聖同天  
結交結君子茅茹自相連媚月增心癖孰能示我愆  
相同即是聖異處且為賢以此求斯道恐成狹且偏  
心能樂取善善自我心全舍已從人處襟懷何大焉  
丁寧再告語無我自天然  
迂儒多曲語仕士自平夷千古周行在胡為向小岐  
荆榛不自剪令我此心迷洞識虛明體超然即在此  
性分同一理此理最淵微孔聖言仁處力行不遠而  
丁寧三告語相與憶所之

尚友希前哲無勞辯淺深開言動喋喋矛戟已森森

祇覺宵懷隘恐非畜德心古人各有見原本自相忱  
豈若異流者馳騁多詖淫何苦但永失宜從得處尋  
丁寧四告語共嚴此心箴

贈人

先生藏遠趨微原欲探討仁風秀群英禮化淑懷抱  
講堂道遙處相與篤皇道芹宮滋松華泮池潤瑤草  
瑤草日日長松華歲歲好君子尚采采衿佩以為寶

哭姜郎中義泉二首姜號義泉名時和

前日哭尚書今日哭郎中大夫相繼死應時命之窮  
但擬同出險豈堪忽告終將吾一掬淚頰洒與西風

吾痛程司馬又哭姜義泉人生值變故與世自相關  
義泉死今日司馬肉未寒義泉瘞今日司馬殯未乾  
桎梏非自取幾微隱禍端悠悠天地裏展轉屬艱難  
五言律詩

雜韻五言律四首

鴈羽衝雲去燕山春意濃孤踪一踣險衰髮兩邊蓬  
戢步緣新綠隈挹暖風將吾眼底事都付不言中  
地隱春遲到幽懷更耐看鴈聲愁遠塞雲影滯餘寒  
斗笠營秦隴絲綸坐渭竿而今耕釣手桔槔亦相安  
我心誠匪鑿遺恨在雲壤豈但身憂切更餘國慮長

九重終自悟一飯亦難忘只恐建炎詔徒憐陳少陽  
身危非所恤多罪累君王萬古綱常理一軀忠義腸  
青天掩長霧白日下繁霜兒女此時淚未知為國傷

即事三首

百年吾宇宙萬里此相逢阨險情由適經綸志復同  
隙風動颭颭窻月照彤彤對榻閑談後悠然世慮空  
衰危親杖屨步履轉徬徨地作臨池濕天從入夜涼  
清颭輕燕室雲影暗幽窻孤念蕭蕭在閑同歲月長  
結髮交游好同舟涉渭濱壯懷今若此老淚更堪頻  
險地忙為苦長天去是真知從大夢裏自了百年身

獄中慰章秀才

萬事總由命宜湏安受之但求一念是莫嘆百憂罹  
窘迫置自處將來做廣居樂天境界上得道是男兒  
有報周磧山先生家慮於獄中者痛而作此

一朝君即死七載我猶生祇墮萬人淚空留百世名  
乾坤藏正氣日月照精誠展輾思餘喘真如草芥輕  
勉仕男讀書二首

長路頻來往空將歲月虛百為超俗慮一步到天初  
使心無盡何須食有魚燕山二尺屋可讀五車書

戰國策馮驩  
自嘆食無魚

斛山遺稿卷二

三十

憂國吾遭難思親汝復來青天何易蔽赤霧總難開  
萬里燕秦路千尋梅棘臺要知百死地不是一身災

有感二首

燕語遺窓外薰風入卧邊真懷死難易歲序幾經遷  
險步終成躓雙毛半已顛獨憐憂世念空向九重懸  
期親堂上老遊子淡潛然假寐驚遽起餘生死復延  
脚跟總實地屋隙是晴天骨肉心難遏百慮日相牽

有感六首

老去心猶壯詩成一洒然襟懷羞縷縷風景嘆年年  
行立凶危地出王日夜天死亡誠旦暮終不受人憐

憶昔躬耕日蓬廬夢九州握珠雖易出按劍總難投  
草芥生猶在君王尚遠謀古來殺諫士誰可免多憂  
好景隨時在幽人心自如難將當世事得免動相殊  
總是更新念還能展舊書古人心已逝誰共嘆憂虞  
夜雨急聲住愔風更覺新獨憐幽景暮空抱此心真  
跬步萬方足經年百死身每憂深罪裏無以荅蒼旻  
庭院幽沉處黃鸝聲自和炎風侵夏木世道轉頽波  
夙志逢時健詔先雙鬢瞻如何人世上獨我憂心多  
有時樂興至觸目更憂來時覺寸心鬱未能盡日開  
人謀尚消息天意自安排將此百年志空餘萬慮及

耐山遺稿卷二

三二

聞黃鳥

庭柯鳴歲月又是一番新憂世總宜獄感時却憶秦  
早梅乘暮雨佳木秀溪濱茅屋遠塵跡空懸老此身

送忽百行

忽生遙以慰五日是歸期倚劍無是跼佇雲有舊思  
自吾蒙困難於子始真知人世關情處難為此別離  
遣仕男歸家

骨肉分離久殷憂切寸忱兒無膝下苦父有坎中深  
顧此五年困皆吾三代心一升與一降物運此相尋

謝信官



患難人多畏信郎獨不疑再從牌上寫囊在手中提  
每日多君厚經年瘠我饒老夫窮困裏報汝一聯詩

陳友三首

園中春早到含淚送心知何處相思切歸來獨坐時  
詩書還有分患難總無期俛仰千年事哲人若在茲  
相逢在縲絏歲序兩推移論難思洪古膏陳各洞披  
朝朝同暮暮切切與悃悃音容今萬里西望日嗟咨  
憂時同講道發興共聯詩而我相逢久真為人世奇  
窮通忘苦樂聚散有歡悲無奈此心切長歌行浩思  
送尹商榘都黃門出獄二首

尹名為相吏科給事中

解山遠稿卷一

三一

數月同幽難一朝慨別離送行無喜色居險有憂思  
好結詩書伴不為貧賤移山林吾素志應筮丈夫需

商榘狀中旌  
得損之需

需極乘時起文明及早開經畫小自用功業大朋來  
氣運機方動人謀預可回兩肩剛骨上擔子是三才

哭翟尚書司馬二首翟璠聯峯名譽

昨夕云長別今晨餘上丘身亡及此地國步為分憂  
一品恩猶在百年事已休園階遙拜下雙淚不能收  
人世誰無死哭君吾倍傷大臣屬手足司馬近藤堂  
豈意獲危險錯思銘太常冤留獄戶外殘葉蔽斜陽

送人出獄

昨暮動相問今朝奈子何別懷增慷慨回首欲滂沱  
一隙蒼天在百年憂境多共隣宇宙內世道類江河  
書聯翁病中屬言後

最可傷心處身危及犴圜青天臨浴水白日照燕山  
各有夷險跡誰無生死關老翁書片紙流淚不能看  
雜作二首

悠悠蒙大難歲月總無涯憂世多君慮好音向我懷  
浩然揮翰思儼若定心齋三接咸亨泰拜舞近天堦

鷗鵬離楚水舒翼到燕臺世道同文運金吾久已開  
寵從天上降人世非常才還喜新榮後恩光次第來  
謝人餽桃

念此幽囚久相逢獨見真論心許忠孝於義多君臣  
良士輕聲譽哲人重保身投桃知子厚報李愧子貧  
贈姜義泉一首義泉未病時自謂將終事出獄索  
詩以贈之過數日病二十日即死命也

十年交與後此地復相逢安土心猶在匡時志已窮  
君當耕蜀下吾欲死獄中樂道捐軀處無言跡未同

